

Faleminderit, zonja drejtuese!

Para se të flas për projektligjin, dua të ngre edhe një herë një shqetësim, që e ngrita dje në Konferencën e Kryetarëve, në lidhje me një akt tjetër arrogance të kësaj qeverie. Komisioni për Shëndetësinë me votat e të gjithë anëtarëve ka thirrur në një seancë dëgjimore dy ministret e Arsimit dhe të Shëndetësisë në lidhje me masat e marra për përballimin e pandemisë në fillimin e vitit të ri shkollor dhe atij akademik. Në kushtet e rritjes së numrave të të prekurve nga COVID19, ky shqetësim për ne bëhet edhe më i madh. Ministria Kushi dje solli përgjigjen që refuzonte të paraqitej pranë komisionit parlamentar me arsyetimin se e ka informuar komisionin dhe nuk i përkasin asaj çështjet e shëndetësisë, pavarësisht se kanë të bëjnë me masat e marra në shkolla apo në universitete. E përsëris që është një përgjigje skandaloze, ndërkohë që ministria Manastirliu po dje pasdite ktheu përgjigje se nuk kishte kohë të vinte të premtën. Ndaj, dua t'u kërkoj edhe një herë Kryeministrit, Kryetares së Kuvendit që t'u tërheqin vëmendjen ministreve dhe t'i urdhërojnë të paraqiten pranë komisionit. Ne e morëm parasysh kërkesën e ministres Manastirliu dhe e riplanifikuam për të hënë në mëngjes dëgjesën për masat e marra nëpër shkolla dhe universitete për përballimin e COVID-it. Jo pa qëllim Kushtetuta ka parashikuar kontrollin parlamentar si mjet për të kontrolluar ekzekutivin. Ndaj agjenda e komisioneve nuk përcaktohet nga ekzekutivi në asnjë rast, por përcaktohet nga deputetët e komisioneve. Të nderuar qytetarë, sot kjo seancë do t'ju bëjë më të varfër; sot borxhi, që po merr Edi Rama për të larë një borxh tjetër, do ta përkeqësojë ekonominë e gjithsecilit prej jush. Kjo qeveri, për shkak të paaftësisë dhe korrupsionit, nuk i përdor këto para për të rritur mirëqenien tuaj, nuk i përdor për të rritur rrogat dhe pensionet, por për të paguar faturat e disa klientëve të saj, të cilët qëllojnë të jenë edhe ortakë në biznese të fshehura. Këto janë fatura të krijuara me borxhe të tjera, duke bërë që shqiptarët të jenë më të varfër dhe me një barrë të rëndë për t'u paguar në vitet që vijnë. Fakti që sot ne po debatojmë për të rritur borxhin e Shqipërisë me 770 milionë euro, 700 milionë Eurobond dhe 70 milionë për korrupsionin në OSHEE, është një shenjë e dështimit flagrant të kësaj qeverie, një qeveri që nuk është në gjendje të paguajë faturat e saj, por duhej të ishte larguar prej kohësh. Qytetarët nuk mund dhe nuk duhet ta mbajnë këtë peshë të rëndë të dështimit të Edi Ramës. Akti i sotëm është një tjetër plaçkitje për shqiptarët, të cilët, nën drejtimin e Edi Ramës, renditen të fundit për nivelin e pagave dhe pensione, të fundit për cilësinë e shërbimit shëndetësor, të fundit për cilësinë e arsimit, të fundit për cilësinë e jetës. I vetmi vend, ku qeveria jonë renditet e para është niveli pandemik i korrupsionit. Çfarë bëjnë me këto para? Ku shkon ky borxh i ri që marrin? Këta nuk bëjnë transparencë, sepse transparenca nxjerr zbuluar pagesat për punësimet elektorale, shërbimin që bëjnë ndaj koncesioneve të tyre korruptive dhe projekteve që u kushtojnë shqiptarëve miliona euro për 1 kilometër. Në emër të këtyre kontratave korruptive, që i paguajnë me borxhin që marrin në emër të shqiptarëve, prishin shtëpitë e shqiptarëve, shkatërrojnë djersën dhe mundin 30-vjeçar, i detyrojnë që të ikin nga sytë këmbët. Edi Rama i trajton shqiptarët si armiq, kur ata i prishin planin për të vjedhur përmes projekteve pa transparencë. Këto ditë po shikojmë se si ai është vërsulur për të prishur banesat në zonën e 5 Majit në Tiranë, sepse i duhet që të lirojë tokë për ta dhënë me PPP-të në një zonë tjetër në Kombin apo diku në Kinostudio. Ishte rrëqethëse dëshmia e sotme e një babai më 3 fëmijë, pa punë, tani edhe pa shtëpi; 35 vjet mund e djersë të ndershme janë rrënuar në vetëm 5 minuta. Këto ditë, ndërsa merr borxh për të bërë 21 milionë euro 1 kilometër rrugë, një tjetër aferë e madhe korrupsioni po merr trajtë tek pjesa e papërfunduar e Unazës së Re. Këtë faturë Edi Rama kërkon ta paguajnë 700 familje me prishjen e banesave të tyre. Qindra qytetarë të njësive 9 dhe 11 në Tiranë janë në protestë prej më se 1 muaji kundër kësaj afere që shkatërron jetën e tyre. Ata preken

nga projekti i segmentit rrugor të unazës Sheshi Shqiponja- Bulevardi i Ri, pra një segment që do t'ju kushtojë taksapaguesve shqiptarë 62 milionë euro për vetëm 3 kilometra rrugë, thënë ndryshe 21 milionë euro për kilometër. Si deputete përfaqësuese e njësive 9 dhe 11, kam marrë me qindra mesazhe nga qytetarë të ndryshëm, të cilët janë të shqetësuar, të stresuar dhe në ankth se munda, puna, djersa e një jete do t'u shkatërrohet e do të mbeten në mes të rrugës. Asnjë nga banorët që kam takuar dhe kam biseduar këto ditë, nuk është kundër zhvillimit, kundër projekteve me interes publik, por janë kundër mënyrës së paligjshme, mungesës së plotë të transparencës dhe mënyrës së panjerzishme të trajtimit. Asnjë përfaqësues i ministrisë, i Autoritetit të Rrugëve apo bashkisë nuk pranon të bisedojë me asnjë nga banorët, pavarësisht thirrjeve të përditshme të banorëve. Vetëm policë apo punonjës që shkojnë si banda, duke terrorizuar banorët në shtëpitë e tyre. Ajo që kërkojnë banorët është transparenca, por as nuk u thuhet, as nuk u jepet, as nuk u tregohet asgjë; heshtje totale. Mungesa totale e informimit pranohet edhe në shkresën zyrtare të ARRSH-së që unë kam sot këtu. Duke biseduar me banorë, evidentohet qartë diskriminimi edhe vetëm për arsye politike, korrupsioni me lejet e legalizimeve kundrejt pagesave nën dorë, krimi elektoral me dhënien e certifikatave të legalizimit gjatë fushatës elektorale. Në një ndërtesë, gjysma është legalizuar, sepse është militant i PS-së, kurse gjysma tjetra është e palegalizuar, sepse mendohet se është anëtar i PD-së. Këto janë leje legalizimi elektorale, selektive, bazuar vetëm në bindjet apo përkatësitë politike apo për ata që kanë dhënë para, shuma marramendëse, nën dorë. Dhjetëra familje janë përpjekur të komunikojnë më ndonjë institucion, me Agjencinë Shtetërore të Kadastrës për të marrë dokumentet e shtëpisë apo informacion për to. E pamundur, askush nuk përgjigjet! Familjarët dyshojnë edhe për zhdukjen e dosjeve të shtëpive të tyre. Kërkoj informimin urgjent të tyre në lidhje me statusin e regjistrimit të pronës së tyre, sepse informimi është detyrim ligjor dhe kushtetues! Le të marrim disa shembuj, meqenëse ministrja do shembuj. Në zonën e quajtur "Josif Pashko", ku kalon projekti, familjet e Nikoll Kolndreut, Fran Kolndreut, Aurel Demkos, Mark Kolndreut, edhe pse i kanë paguar prej vitesh të gjitha faturat apo detyrimet, nuk i kanë marrë certifikatat e pronësisë. Gjithashtu, familja Marku, që i ka futur dokumentet e legalizimit që në nisje të procesit, nuk ia kanë marrë ende, edhe pse të gjithë rreth e rrotull i kanë marrë. Edhe familjet Seçi dhe Haxhisefa janë pa dokumente, edhe pse të gjithë fqinjët i kanë marrë ato. Në zonën e sheshit "Shqiponja" Musa Ahmet Hyseni, edhe pse rreth e rrotull të gjithë janë me certifikata legalizimi, ai jo. Pse ka dy standarde? Projekti është miratuar para disa muajsh, thotë ARRSH-ja. Pse nuk janë pajisur banorët me dokumentet përkatëse të legalizimit. Ka edhe një pretendim tjetër, dhe unë do të doja një përgjigje nga ju sot, zonja Ministre, banorët pretendojnë se projekti është devijuar. Siç e shikoni, ata pretendojnë se kjo është gjurma e vjetër dhe kjo me portokalli është gjurma e re. Pyetja që kam për ju, dhe dua që ta mbani shënim, sepse unë do ta vazhdoj deri në fund këtë çështje: cila është arsyeja? Nëse ka ndodhur devijimi, pse është devijuar? Banorët denoncojnë se devijimi i projektit është bërë për të ruajtur dhe për të futur brenda unazës sipërfaqe, për të cilat Edi Rama dhe Erion Veliaj kanë firmosur leje të tjera për kulla të pastrimit të parave. Kush qëndron pas këtyre lejeve? Cili është oligarku që arriti ta devijojë një gjurmë të tërë? Sot, zonja Ministre, keni detyrë që t'ua shpjegoni banorëve të gjitha këto pyetje që ata kanë muaj që i bëjnë, por nuk marrin asnjë përgjigje. Në datën 29 kam kërkuar informacion nga ministrja Balluku, nga Erion Veliaj në lidhje me këtë projekt. Përveç ARRSH-së, që e solli jashtë afateve, as ministrja e as kryetari i bashkisë nuk kanë respektuar detyrimet e tyre. Kjo është një tjetër shkelje kushtetuese. Të dashur qytetarë, Ky projekt shkatërron 654 ndërtesa dhe preken 700 familje. Ajo që unë kërkoj sot në emrin tuaj është që secila kategori, qofshin me certifikatë pronësie, me leje legalizimi, në proces legalizimi apo pa dokumente, të bëhet pjesë e skemës së shpronësimit, pa dallim e diskriminim. Së dyti, vlera e shpërblimeve të jetë sipas çmimeve të tregut. Së treti, pagesat t'u jepen përpara se shtëpitë e tyre të prishen, që të kenë mundësi për të siguruar strehim tjetër dhe, nëse ka pronarë të pakompensuar, të futen në fondin e shpronësimeve. Kaq ua keni borxh këtyre qytetarëve. Janë ata që

po paguajnë me sakrificë për borxhet e korrupsionit të qeverisjes së Edi Ramës, pra është koha t'ua ktheni borxhin e të mos i lini pa çati mbi kokë. Faleminderit!